

Na osnovu člana 13. Zakona o principima lokalne samouprave u Federaciji BiH ("Službene novine FBiH", br. 49/06 i 51/09), čl. 10. i 68. Statuta Općine Centar ("Službene novine Kantona Sarajevo", br: 23/04 Prečišćeni tekst), a u vezi sa tačkom 5. Smjernica o minimalnim standardima dodjele proračunskih sredstava putem transfera i subvencija u Federaciji Bosne i Hercegovine („Službene novine Federacije BiH“ 37/24) Općinsko vijeće Centar je, na Petoj redovnoj sjednici održanoj, dana 27.03.2025.godine, donijelo

**PRAVILNIK
O USLOVIMA, NAČINU I KRITERIJIMA ZA DODJELU SREDSTAVA VJERSKIM
ZAJEDNICAMA**

**Član 1.
(Predmet Pravilnika)**

Ovim Pravilnikom utvrđuju se uslovi, način i kriteriji za dodjelu sredstava vjerskim zajednicama iz Budžeta Općine Centar.

**Član 2.
(Uslovi za ostvarivanje prava)**

- (1) Sredstva iz člana 1. ovog Pravilnika dodjeljuju se vjerskim zajednicama koje imaju sjedište ili izgrađene vjerske objekte na području općine Centar.
- (2) Izuzetno od odredbi iz stava (1) ovog člana sredstva se mogu dodijeliti i vjerskim zajednicama koje nisu na području Općine Centar, ali su od značaja za redovno obavljanje vjerskih obreda lokalnog stanovništva.

**Član 3.
(Način ostvarivanja prava)**

- (1) Sredstva iz člana 1. ovog Pravilnika dodjeljuju se putem Javnog poziva i podnesenih zahtjeva po istom.
- (2) Zahtjeve iz stava (1) ovog člana podnose vjerske zajednice na propisanom obrascu, a koji je sastavni dio Javnog poziva.
- (3) Javni poziv raspisuje Općina Centar putem nadležne Službe, a isti se objavljuje na web stranici Općine, i ostaje otvoren 30 dana od dana objavljivanja.
- (4) Zahtjevi se dostavljaju službi nadležnoj za obrazovanje, društvene djelatnosti, kulturu i sport (u daljem tekstu: Služba) putem protokola Općine ili putem pošte.
- (5) Zahtjeve iz stava (4) ovog člana razmatra Komisija za provođenje postupka dodjele sredstava vjerskim zajednicama (U daljem tekstu: Komisija za provođenje postupka), a koju imenuje općinski načelnik.

- (6) Komisija za provođenje postupka dužna je prije dostavljanja prijedloga odluke o dodjeli sredstava općinskom načelniku pribaviti mišljenje Komisije za odnose sa vjerskim zajednicama Općinskog vijeća Centar Sarajevo (U daljem tekstu: Komisija općinskog vijeća).
- (7) Općinski načelnik, donosi odluku o raspodjeli sredstava vjerskim zajednicama, te putem nadležne Službe objavljuje preliminarnu listu odabranih korisnika.
- (8) Nakon okončanog postupka prigovora Općinski načelnik donosi konačnu odluku, na osnovu koje se donosi Zaključak ili Ugovor o raspodjeli sredstva.
- (9) Na osnovu Zaključka/Ugovora nadležna služba za finansije vrši isplatu sredstva.

Član 4. (Pravo prigovora)

- (1) Podnosilac zahtjeva može u roku od osam dana od dana objavljivanja preliminarne liste korisnika iz člana 3. stav (7) ovog Pravilnika podnijeti pismeni prigovor Komisiji za razmatranje prigovora koju imenuje Općinski načelnik iz reda državnih službenika.
- (2) Odluku o prigovoru, Komisija će donijeti u istom roku, računajući od dana njegovog podnošenja.

Član 5. (Kriteriji za dodjelu sredstava)

- (1) Sredstva iz člana 1. ovog Pravilnika raspodjeljuju se vjerskim zajednicama za projektne i druge aktivnosti, i to:
 1. Institucijama IZ u BiH – Medžlis IZ Sarajevo i dr. – 50 % od ukupno planiranih budžetskih sredstava za vjerske zajednice.
 2. Institucijama Katoličke crkve u BiH – Vrhbosanska nadbiskupija i dr. – 25 % od ukupno planiranih budžetskih sredstava za vjerske zajednice.
 3. Institucijama SPC u BiH - Mitropolija Dabrobosanska i dr. – 15% od ukupno planiranih budžetskih sredstava za vjerske zajednice.
 4. Institucijama Jevrejske zajednice BiH – Jevrejska općina Sarajevo – 10% od ukupno planiranih budžetskih sredstava za vjerske zajednice.
- (2) Sredstva iz stava (1) ovog člana dodijeljuju se za:
 - a) građevinsko – zanatske radovi, sanacije, ili rekonstrukcije postojećeg vjerskog objekta ili dijela objekta, kao i izgradnja – dogradnja novog objekta ili dijela objekta;
 - b) organizacija vjerskih praznika, blagdana, manifestacija, vjersko – kulturnih i prosvjetnih događaja, tribina, okruglih stolova, te raznih oblika i vidova prezentiranja stvaralaštva vjerske zajednice, kao i štamparsko – izdavačke, prevodilačke i druge aktivnosti.
- (3) Prednost za dodjelu sredstava kapitalnog granta imaju vjerski objekti sa područja Općine Centar Sarajevo, te oronuli, dotrajali objekti koji imaju status kulturno historijskog nasljeđa ili su pod zaštitom države, kao i objekti čije stanje ugrožava sigurnost imovine i lica.

- (4) Ukoliko neka od vjerskih zajednica iz stava (1) ovog člana ne dostavi svoje zahtjeve na Javni poziv Komisija za provođenje postupka može predložiti preraspodjelu sredstva na druge vjerske zajednice, u skladu sa dostavljenim zahtjevima.

Član 6. (Eliminatorski kriteriji)

- (1) Komisija za provođenje postupka neće razmatrati zahtjeve za dodjelu novčanih sredstava onim vjerskim zajednicama koje nisu u skladu sa Odlukom o izvršenju budžeta Općine Centar dostavile izvještaj o utrošku novčanih sredstava za prethodnu godinu.
- (2) Komisija za provođenje postupka neće razmatrati zahtjeve pojedinačnih vjerskih objekata za dodjelu novčanih sredstava iz kapitalnog i tekućeg granta, nego isključivo zahtjeve vjerskih zajednica, bez obzira na pravni status (položaj) vjerskog objekta.
- (3) Komisija za provođenje postupka neće razmatrati zahtjeve čija vrijednost prelazi iznos ukupno planiranih sredstava u Budžetu za ove namjene bez dokaza o obezbjeđenju dodatnih sredstava od strane drugih donatora.

Član 7. (Potrebna dokumentacija)

- (1) Zahtjev za dodjelu sredstava - detaljno obrazložen, sa preciznim informacijama o projektu, sa predmjerom i predračunom radova, planiranim aktivnostima, namjeni sredstava (sanacija, rekonstrukcija, druga namjena),
- (2) Potrebne dozvole i saglasnosti (urbanističke, građevinske, saglasnosti Komisije za očuvanje nacionalnih spomenika i sl.) ukoliko se radi o radovima koji podrazumijevaju ovakvu vrstu dokumentacije,
- (3) Dokaz o obezbjeđenju dijela sredstva (ukoliko su u pitanju građevinski radovi vrijednosti preko 10.000 KM),
- (4) Uz zahtjev za dodjelu sredstva iz člana 5. stav (2) tačka b), vjerske zajednice su dužne dostaviti projekat sa kojim apliciraju za novčanu podršku, odnosno navesti naziv projekta, cilj, aktivnosti, planirano vrijeme realizacije, očekivani broj učesnika, mjesto realizacije, budžet planiranih aktivnosti sa jasno definisanim budžetskim stavkama i pojedinačnim iznosima.
- (5) Bankovna instrukcija za plaćanje (potvrda o broju tekućeg računa).

Član 8. (Praćenje i izvještavanje)

- (1) Izvještaje vjerskih zajednica obrađuje i prati nadležna općinska služba.
- (2) Služba je dužna redovno izvještavati Komisiju Općinskog vijeća o pristiglim izvještajima, sadržaju i ispravnosti izvještaja.
- (3) Komisija je dužna izvještavati Općinsko vijeće o provođenju ovog Pravilnika, a u okviru izvještaja o radu Komisije.

**Član 9.
(Finansijska sredstva)**

Finansijska sredstva za realizaciju ovog Pravilnika utvrđuju se Budžetom Općine Centar za svaku kalendarsku godinu.

**Član 10.
(Prestanak važenja)**


Stupanjem na snagu ovog Pravilnika prestaje da važi Pravilnik o uslovima, načinu i kriterijima za dodjelu sredstava vjerskim zajednicama („Službene novine Kantona Sarajevo“, broj: 15/24).

**Član 11.
(Stupanje na snagu i objava)**

Pravilnik stupa na snagu narednog dana od dana objave na Oglasnoj ploči Općine Centar, a naknadno će se objaviti u „Službenim novinama Kantona Sarajevo“.

Broj:01-04-54/25

Datum:27.03.2025.godine



PREDSEDAVAJUĆI OPĆINSKOG VIJEĆA

Benjamin Isović

Ovaj Pravilnik objavljen je na oglasnoj ploči Općine Centar Sarajevo dana 04-04-2025